

900

Na osnovu člana 21. stav (3) Zakona o obrazovanju odraslih ("Službene novine Tuzlanskog kantona", broj: 9/15), a na prijedlog Kantonalne Privredne komore Tuzla broj: I-04-494/18 od 11.10.2018. godine, ministar obrazovanja i nauke Tuzlanskog kantona donosi

P R A V I L N I K

**o izmjenama Pravilnika o načinu provjere i verifikacije
poslodavaca kod kojih se obavlja praktičan rad,
sadržini i načinu vođenja Registra poslodavaca**

Član 1.

U Pravilniku o načinu provjere i verifikacije poslodavaca kod kojih se obavlja praktičan rad, sadržini i načinu vođenja Registra poslodavaca („Službene novine Tuzlanskog kantona”, br. 11/17 i 10/18) u članu 3. stav (7) mijenja se i glasi:

„(7) Komisiju čine tri člana koju imenuje predsjednik Privredne komore“.

U istom članu stav (12) mijenja se i glasi:

„(12) Naknada iz stava (11) ovog člana iznosi 200,00 KM (dvijestotine KM) po programu“.

Član 2.

(Stupanje na snagu)

Ovaj pravilnik stupa na snagu danom donošenja i objavit će se u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Ministarstvo obrazovanja
i nauke
Broj: 10/1-38-32057/18
Tuzla, 18.10.2018. godine

MINISTAR
Mr. sci. Zlatan Muratović, v.r.

901

Na osnovu člana 62. stav (3) Zakona o naučnistraživačkom radu („Službene novine Tuzlanskog kantona“, broj: 14/17), ministar obrazovanja i nauke donosi

P R A V I L N I K

o načinu provjere rada naučnoistaživačkih organizacija

I. OPĆI DIO

Član 1.

(Predmet Pravilnika)

Ovim pravilnikom uređuju se način provjere rada naučnoistraživačkih organizacija upisanih u Registar naučnoistraživačkih organizacija (u daljem tekstu: Registar) na području Tuzlanskog kantona (u daljem tekstu: Kanton).

II. POSTUPAK POVJERE RADA JAVNIH NAUČNOISTRAŽIVAČKIH ORGANIZACIJA

Član 2.

(Nadležnost za provjeru rada)

(1) Provjeru rada javne naučnoistraživačke organizacije vrši Komisija za ocjenu rada naučnoistraživačke organizacije (u daljem tekstu: Komisija).

(2) Komisija broji tri člana, i to dva iz reda Ministarstva obrazovanja i nauke Tuzlanskog kantona (u daljem tekstu: Ministarstvo) i eksternog člana Kantonalnog savjeta.

(3) Komisija se imenuje u skladu sa odredbom člana 63. stav (1) Zakona o naučnoistraživačkom radu (u daljem tekstu: Zakon).

(4) Komisija vrši provjeru rada ostalih naučno-istraživačkih organizacija u dijelu koji je financiran, odnosno sufinanciran iz bužeta Tuzlanskog kantona.

Član 3.

(Postupak provjere)

(1) Postupak provjere rada naučnoistraživačke organizacije pokreće se podnošenjem zahtjeva za provjeru rada naučnoistraživačke organizacije (u daljem tekstu: zahtjev).

(2) Zahtjev se podnosi Ministarstvu.

(3) Zahtjev u pravilu podnosi naučnoistraživačka organizacija.

(4) Izuzetno, zahtjev podnosi Kantonalni savjet za nauku i tehnologiju (u daljem tekstu: Savjet) kada zahtjev u propisanom roku ne podnese naučnoistraživačka organizacija.

(5) Zahtjev sadrži podatke o naučnoistraživačkoj organizaciji čiji rad treba provjeriti.

(6) Uz zahtjev, kod javne naučnoistraživačke organizacije prilaže se sljedeća dokumentacija:

a) spisak realizovanih programa naučnoistraživačkog rada i

b) ugovori o radu sa zaposlenim naučnim radnicima.

(7) Kod ostalih naučnoistraživačkih organizacija, uz zahtjev se prilaže spisak realizovanih programa naučnoistraživačkog rada koji su finansirani, odnosno sufinansirani od strane Ministarstva.

Član 4.

(Kriteriji za vrednovanje naučnoistraživačkog rada javnih naučnoistraživačkih organizacija)

(1) U postupku provjere rada javne naučnoistraživačke organizacije vrednuje se cjelokupna naučnoistraživačka kompetentnost naučnoistraživačke organizacije i istraživača.

(2) Naučnoistraživačka kompetentnost naučno-istraživačke organizacije vrednuje se za period od osnivanja naučnoistraživačke organizacije do podnošenja zahtjeva za provjeru, odnosno za period od tri godine od zadnje provjere, na osnovu sljedećih kriterija:

a) broja naučnoistraživačkih projekata koje finansira Ministarstvo,

b) broja naučnoistraživačkih projekata u okviru međunarodne saradnje,

c) broja naučnoistraživačkih projekata ostvarenih u saradnji sa privredom ili drugim ustanovama ili institucijama,

d) broja ostvarenih rezultata na projektima koje finansira Ministarstvo, sadržanih u godišnjim izvještajima,

e) strukture istraživača u radnom odnosu sa punim radnim vremenom po naučnim ili nastavnim zvanjima,

f) istraživačkih projekata ostvarenih u međunarodnim projektima;

g) rezultata projekata ostvarenih u saradnji sa privredom i na tržištu, odnosno rezultata koji su primijenjeni u privredi ili koji su komercijalizovani na tržištu,

h) obima i kvaliteta izdavačke djelatnosti naučnoistraživačke organizacije (periodične i monografske),

i) raspoloživosti adekvatnog prostora, radnog i laboratorijskog dovoljnog za obavljanje naučnoistraživačke djelatnosti u oblasti za koju se naučnoistraživačka organizacija provjerava,

j) raspoloživosti opreme za realizaciju teorijskog i eksperimentalnog naučnoistraživačkog rada u oblasti/oblastima za koju/koje se naučnoistraživačka organizacija provjerava,

k) raspoloživosti bibliotečkih resursa i pristupa naučno-informativnoj dokumentaciji i dokumentaciji u oblasti/oblastima za koju/koje se vrši provjera naučnoistraživačke organizacije,

l) obezbjeđenja javno dostupnih informacija o naučnoistraživačkom radu, uređena web stranica.

(3) Za provjeru rada javne naučnoistraživačke organizacije za koju se prvi put vrši provjera vrednuju se naučnoistraživački rezultati koje su ostvarili zaposleni istraživači u radnom odnosu sa punim radnim vremenom u prethodne tri godine.

(4) Pored kriterija iz stava (2) ovog člana kod provjere rada instituta (naučnoistraživačkih ili istraživačkorazvojnih instituta) kao javnih naučnoistraživačkih organizacija Komisija provjerava i sljedeće kriterije:

a) da li ima i da li realizuje program naučnoistraživačkog rada koji je usvojilo naučno vijeće instituta sa precizno definisanim cjelinama vezanim za naučnoistraživačku oblast kojom se javna naučnoistraživačka organizacija bavi i za koju se vrši provjera a koji je usklađen sa ciljevima naučnog i tehnološkog razvoja Kantona;

b) da li ima i da li realizuje program razvoja naučnoistraživačkog podmlatka, prezentirajući podatke o broju doktorskih teza koje su realizovane ili se realizuju tokom perioda provjere na institutu;

c) da ima organizacionu strukturu i upravljanje usklađeno sa Zakonom i proceduru izbora saradnika u nastavna i naučna zvanja usklađena sa Zakonom;

d) ima organizovan naučnoistraživački rad kroz projekte koji su finansirani iz budžeta Kantona, iz fondova Evropske unije ili drugih domaćih ili međunarodnih institucija koje finansiraju naučnoistraživačke aktivnosti.

Član 5.

(Kriteriji za provjeru Centra izuzetnih vrijednosti)

Kod provjere Centra izuzetnih vrijednosti (u daljem tekstu: Centar) kao javne naučnoistraživačke organizacije, Komisija pored uslova predviđenih za osnivanje Centra provjerava i sljedeće uslove, i to:

a) da Centar ima najmanje 12 zaposlenih saradnika sa punim radnim vremenom, od čega je najmanje sedam istraživača u naučnim ili nastavnim zvanjima i najmanje četiri u statusu naučni savjetnik ili redovni profesor. Najmanje 60% saradnika u naučnim zvanjima mora da bude u kategorijama u dvije najviše istraživačke kategorije;

b) ima program naučnoistraživačkog rada i program razvoja naučnoistraživačkog podmlatka;

c) da Centar ispunjava najmanje osam od sljedećih kvalitativnih pokazatelja:

1. da ostvaruje priznate naučne rezultate sopstvenim kadrovskim i materijalnim kapacitetima, na visokom naučnom nivou po međunarodnim standardima;

2. da ostvaruje kvalitetno vođenje mladih istraživača samostalno ili kroz saradnju sa drugim centrima u zemlji ili inostranstvu i kroz organizovanje naučnih seminara, ljetnjih škola, intenzivnih naučnih kurseva i sl;

3. da ima međunarodne projekte i saradnju sa institucijama kojima pored naučne može da pruža i stručnu pomoć u razvoju odgovarajuće djelatnosti zavisno od oblasti nauke;

4. da su saradnici Centra dobijali nagrade i međunarodna i vrhunska nacionalna priznanja, ranije ili u toku rada Centra;

5. da saradnici Centra imaju članstva u akademijama, zvanja članova društva na najvišem elitnom nivou dostupnog uskom krugu od najviše 10% članova, posebne statute na inostranim univerzitetima i institutima (gostujući profesori) i elitne stipendije;

6. da su saradnici Centra članovi uređivačkih odbora priznatih časopisa međunarodne reputacije;

7. da saradnici Centra imaju članstva u naučnim komitetima i međunarodnim odborima i tijelima konferencije visoke reputacije;

8. da saradnici Centra imaju pozive u toku provjere ili prethodnog perioda provjere da održe uvodna predavanja po pozivu na konferencijama visoke reputacije;

9. da su saradnici Centra organizovali konferencije visoke međunarodne reputacije;

10. da su saradnici Centra publikovali visoko citirane radove- (radovi citirani više od 100, ili 50 puta, broj radova sa više od 10 citata), posebno uzimajući u obzir radove ostvarene u okviru Centra u prethodnoj provjeri ili u grupi koja je bila osnova za formiranje Centra;

11. da radovi saradnika Centra imaju visok opći broj citata prema uslovima i naučnim oblastima, odnosno drugi pokazatelji značajnog naučnog odjeka rezultata istraživanja;

12. da su u okviru Centra ili grupe koja mu je prethodila u prethodne tri godine realizovane doktorske disertacije;

13. da postoje realizacije primijenjenih istraživanja u skladu sa ličnostima naučne discipline;

14. da je postojala ili postoji realizacija značajnih primjena prema ličnostima naučne discipline i tematike;

15. da Centar ima dostupnu internet prezentaciju i druge vidove komunikacije koji nedvosmisleno pokazuju ulogu Centra, tekuće aktivnosti, resurse i njegova postignuća.

Član 6.

(Kriteriji za ocjenu rada ostalih naučnoistraživačkih organizacija)

Kriteriji za ocjenu rada ostalih naučnoistraživačkih organizacija koje se finansiraju odnosno sufinansiraju iz budžeta Kantona su:

a) broj naučnoistraživačkih projekata koje finansira, odnosno sufinansira Ministarstvo,

b) broj naučnoistraživačkih projekata u okviru međunarodne saradnje, ukoliko su isti dijelom finansirani, odnosno sufinansirani od strane Ministarstva,

c) broj naučnoistraživačkih projekata ostvarenih u saradnji sa privredom ili drugim ustanovama ili institucijama ukoliko su isti dijelom finansirani, odnosno sufinansirani od strane Ministarstva,

d) broj ostvarenih rezultata na projektima koje finansira, odnosno sufinansira Ministarstvo, sadržanih u godišnjim izvještajima,

Član 7.

(Provjera kriterija)

Kriterije iz člana 4. stav (2), člana 5. i člana 6. ovog pravilnika, provjerava Komisija uvidom u raspoloživu dokumentaciju naučnoistraživačke organizacije i na licu mjesta.

Član 8.

(Postupak provjere rada)

(1) Po prijemu zahtjeva, Komisija cijeni kompletnost zahtjeva i obavlja provjeru kvaliteta naučnoistraživačkog rada.

(2) Ukoliko zahtjev ne sadrži sve tražene podatke iz člana 3. stav (2) ovog pravilnika ili dokumentacija koja je dostavljena uz zahtjev nije potpuna, Komisija pismeno obavještava podnosioca zahtjeva o nedostacima uz utvrđeni rok za dopunu ili ispravku zahtjeva.

(3) Rok iz stava (2) ovog člana ne može biti duži od 30 dana.

(4) Ukoliko podnosilac zahtjeva iz člana 3. ovog pravilnika ne otkloni uočene nedostatke u propisanom roku iz stava (3) ovog člana, Komisija će na licu mjesta izvršiti uvid u neophodnu dokumentaciju.

Član 9.

(Kodeks ponašanja)

Tokom rada svaki član Komisije mora biti nepristrasan u odnosu na javnu naučnoistraživačku organizaciju, i da sve informacije sadržane u dokumentaciji koja je predmet razmatranja neće ni pod kojim uslovima otkrivati bilo kojem licu koje nije zvanično uključeno u postupak utvrđivanja ispunjenosti uslova.

Član 10.

(Način rada Komisije)

(1) Komisija radi u punom sastavu i o svim preduzetim radnjama i uočenom sačinjava zapisnik.

(2) Ako u postupku Komisija utvrdi da postoje određene nepravilnosti i da nisu potpuno ispunjeni propisani uslovi, zapisnikom nalaže podnosiocu zahtjeva da otkloni uočene nepravilnosti i određuje mu rok za to.

(3) Na osnovu konačno utvrđenog stanja Komisija sačinjava zapisnik i dostavlja Savjetu prijedlog pozitivne ili negativne ocjene o radu naučnoistraživačke organizacije.

(4) Prijedlog ocjene iz stava (3) ovog člana Komisija dostavlja i javnoj naučnoistraživačkoj organizaciji čiji se rad ocjenjuje.

(5) Naučnoistraživačka organizacija iz stava (4) ovog člana ima pravo uložiti prigovor na prijedlog ocjene u roku od 30 dana od dana prijema prijedloga ocjene Kantonalnom savjetu.

(6) Kantonalni savjet u roku od osam dana po isteku roka iz stava (5) ovog člana utvrđuje konačnu ocjenu o radu naučnoistraživačke organizacije koju uz preporuke dostavlja Ministarstvu.

III. ZAVRŠNE ODREDBE

Član 11.

(Stupanje na snagu pravilnika)

Ovaj pravilnik stupa na snagu danom objavljivanja u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Ministarstvo obrazovanja
i nauke
Broj: 10/1-38-27897-2/18
Tuzla, 30.10.2018. godine

Mr. sci. Zlatan Muratović, v.r.

902

Na osnovu člana 111. stav (4) Zakona o osnovnom odgoju i obrazovanju („Službene novine Tuzlanskog kantona“, br. 9/15, 6/16 i 14/18), Ministarstvo obrazovanja i nauke Tuzlanskog kantona donosi

PRAVILNIK

o postupku utvrđivanja odgovornosti i prijevremenom razrješenju direktora osnovne škole čiji je osnivač Skupština Tuzlanskog kantona

I. OPĆE ODREDBE

Član 1.

(Predmet)

Ovim pravilnikom uređuje se postupak utvrđivanja odgovornosti, a posebno načela po osnovu kojih se provodi postupak, organi i lica ovlašteni za podnošenje prijedloga za prijevremeno razrješenje, obaveze i ovlaštenja organa koji učestvuju u postupku utvrđivanja odgovornosti, način donošenja i vrste odluka, te rokovi za pokretanje i vođenje postupka prijevremenog razrješenja direktora osnovne škole čiji je osnivač Skupština Tuzlanskog kantona (u daljem tekstu: direktor, škola i Skupština).

Član 2.

(Upotreba rodnoosjetljivog jezika)

Gramatički izrazi upotrijebljeni u ovom pravilniku za označavanje muškog ili ženskog roda podrazumijevaju oba roda.

Član 3.

(Prijevremeno razrješenje direktora)

(1) Pod prijevremenim razrješenjem podrazumijeva se razrješenje sa dužnosti direktora prije isteka mandata na koji je imenovan.

(2) Postupak prijevremenog razrješenja direktora pokreće se od strane školskog odbora, a podrazumijeva aktivnosti koje se odnose na radnje koje se preduzimaju nakon zaprimanja dokumentacije ili zaprimanja saznanja do kojih se došlo na drugi način, koji upućuju ili kojim se dokazuje osnovanost prijedloga za pokretanje postupka i donošenje odluke o razrješenju direktora prije isteka mandata na koji je imenovan.